

Danki Dios pa Boneiru

Kada bes ku nos ta kanta nos himno nashonal, nos ta ekspresá ku apesar di e defektonan di nos isla, "nos ta stime'le ariba tur kos." Maske e palabranan (i intenshon) ta bunita, en realidat nos sa dediká mayoria di nos atenshon na e defektonan di Boneiru. Di berdat esei ta algu sano, pasobra si nos ke mira un adelanto pa nos isla, nos mester nota i analisá nos defektonan, problemanan, debilidadnan, i puntonan negativo ophetivamente.

E búskeda pa loke ta malu ta un parti normal di bida. E médiko mester hasié pa diagnostiká e malesa ku ta torturá su pashènt. Téknikonan mester tin e mentalidat ei pa haña e motibu ku un aparato no ta traha. Bonaire Tourism Corporation mester analisá loke ta stroba turismo. Polis ta patruyá, buskando loke ta ilegal.

Komo resultado di tantu atenshon pa ku problemanan—defektonan di nos isla—ta fásil pa nos krea un aktitut di negativismo. Nos ta keha, kritiká, i reklamá. Nos ta paga tantu tino na e defektonan di nos isla ku kasi nos ta lubidá ku "nos ta stime'le ariba tur kos."

Ta un bon kos ku entre e 365 dia di konsentrashon riba defektonan, tin sikiera un dia fihá kada aña pa refleksjoná positivo pa ku nos isla, Dia di Boneiru.

Maske nos ta atmití ku defektonan t'ei, nos ta rechasá e mentalidat ku defektonan **so** t'ei! Nos tin hopi pa kua nos por ta agradesidu. Dios a basha Su bendishon riba nos isla na maneranan ku talbes nos no ta ni kòrda.

Por ehempel, for di ki dia bo a gradisi Dios ku ta e hulandesnan ku a kolonialisá nos isla? Hulanda i su lidernan tambe tabatin i tin nan defektonan. Ma en general, historia ta komprobá ku e pólisanan di esnan ku nos ta yama "makamba" tabata muchu mas generoso ku e pólisanan algun otro pais ku a establese kolonianan na diferente parti di mundu. Hopi nashon awendia ta haña nan den un estado di pobresa komo resultado di e práktikanan egoista di esnan ku a kolonialisá nan pais. E kolonianan di Spaña i Portugal sigur no a benefisiá asina tantu ku nos isla. Maske Hulanda su pólisanan tin ora ta leu di perfekto, tòg nos mester atmití ku te awe nos ta kosechá e fruta dushi di nan generosidat.

Den último añanan nos por nota un adelanto ekonomiko formal riba nos pida baranka. Turismo, e pilar di nos ekonomia, ta kresiendo rápidamente. Komo ku e pilar ta fuerte, esaki tin un afekto positivo riba tur parti di nos ekonomia. Tin konstrukshon tur kamina: hotèl, apartamentu, kas, pakus, "shopping mall," botika, djentista, karetera, lugá pa stashoná outo, èts. Kontratistanan kasi no ta haña chèns pa sosegá ku tantu proyekto demandando nan atenshon.

Tur esaki tin un influensia positivo riba nos finansanan personal. Nos ta keha ku preisnan na Boneiru ta haltu i ku nan ta subi ketu bai. Kisas nos ta lucha pa kubri tur nos gastunan. Ma tòg nos nivel ekonomiko ta muchu mas mihó ku hopi parti di mundu. Kuantu hende di paisnan i islanan bisiaña ta deseá ku nan por tabatin oportunidat di biba na Boneiru i gosa di e sèn ku segun nos nunca ta sufisiente!

No laga nos pensa ku tur e desaroyonan positivo na nos isla ta resultado di solamente nos esfuerso. Beibel ta bisa pa kòrdá ku Dios "ta dunabo poder pa gana rikesa..." (Deuteronomio 8:18). Nos ta gradisí nos Kreador pa e ekonomia fuerte di nos isla stimá?

Ultimo tempu nos a tende hopi tokante kriminalidat di Kòrsou. Ta parse ku tur ora tin un otro hinkamentu, un otro kiebro i ladronisia di dia i anochi, un otro atrako, un otro tiroteo, un otro asesinato.

Nos ta preokupá pa nos isla tambe. Kriminalidat ta oumentando na Boneiru. Ma nos "tera di solo i suave bientu" ainda no konosé e grado di aktividat kriminal ku nos "hermana" isla. Te ainda (ku poko eksepsjon) nos por hiba nos bidanan trankil. Nos no mester biba den un forti tur protehá pa trali i kandal. Nos por kana trankil riba kaya anochi sin miedu di ta un víktima di un òf otro krimen. Nos por gradisí Dios ku te ainda nos Boneiru ta asina!

No tin espasio pa lista e tantisimo otro fasilidatnan i benefisionan di bida ku nos ta gosa na nos isla, manera nos nivel di edukashon, libertat di religion i ekspreshon, demokrasia, karchi di dòkter, ònderstant, ousensia di terorismo, i asta nos solo ku segun nos ta produsí tantu kalor (ma ku algun pais por imaginá so pasobra e ta skondí tras di e nubianan i frieldat), èts. Kompará ku otro isla karibense i pais latino, Dia di Boneiru di berdat mester ta un dia di selebrashon!

Nos no ta konsiente mes di hopi di Dios Su bendishonnan pa ku nos ku ta biba na "dushi Boneiru, nos tera stimá." Tin ora nos asta ta permití nos mentalidat di negativismo stroba nos di realisá kon "riku" nos ta di berdat. Nos ta keha i murmurá ku no ta mihó, na lugá di gradisí Dios pa e tantisimo bendishonnan ku nos tin tur rònt di nos. Nos no mester lubidá ku nan tur ta bin for di Kreador di nos isla.

Ora nos ta kòrda nos isla, ta bon pa nos kòrda e dicho arabir: "Mi a keha ku mi no tabatin sapatu, te dia mi a mira un hende ku no tabatin pia." Na lugá di konsentrá riba loke nos no tin, nos problemanan, nos defektonan,

laga nos pouza i "duna gradisimentu na SEÑOR, pasobra E ta bon" (Salmo 136:1) tur dia, i espesialmente riba Dia di Boneiru.